



Oppsummering:

Vi hadde ein veldig hyggeleg kveld saman på Haus skule måndag 28. mars 2022. Deltakarane representerte for det meste seg sjølv, men lokale, frivillege organisasjonar som mellom anna musikklag, grendaråd og idrettslag, stort sett frå Haus og Bruvik, var òg representert. Det var ei fin blanding av aldrar, frå barn til godt vaksne. Me jobba saman, og med 5 prosjektidear som kan auka livskvaliteten og samhaldet i bygda og på resten av Osterøy.

Verdiar og viktige mål:

Vi byrja med å dela forteljingar om kva som er det gode, fysiske livet på Osterøy. Folk set stor pris på naturen og moglegheitene rundt Haus og Bruvik, og eigentleg heile Osterøy. Det er mykje som er tilgjengeleg sjølv om ein kan blir litt skiten på beina når ein går i fjellet. For folk som vil ha det litt rolegare, finst det meir avslappande turar med seniorturlaget og turgjengen som møtest kvar onsdag kl. 11 ved Kiwi'en. Her er òg ei fantastisk dugnadsånd som verkeleg får ting til. Dugnadene vart nemnde som ein måte der lokalsamfunnet verkeleg samlast på tvers av generasjonar. Sanatoriet er eit godt døme på eit slikt samarbeid. Vi kan òg få til mykje godt samarbeid på gardane rundt omkring. Med gardsarbeid kan vi vera ute og jobba med kultur og fysisk aktivitet. Vi kjenner på samhaldet når vi jobbar slik. Dette samhaldet kjenner vi i mange aktivitetar på Osterøy og ikkje minst gjennom musikk og det fine miljøet rundt musikklaget. Møteplassar finst det overalt, men det kunne vore fleire. Haus har fine badeplassar som er gode møteplassar for alle. Unge hausingar liker å hoppa på trampoline. Dei hoppar i hagane til vener, men kunne tenkt seg ein trampoline som er lett tilgjengeleg i nærmiljøet. Gjennom diskusjon fekk vi lista med verdiar ned til fire hovudverdiar eller -mål som vi skulle bruka til å utforma idear for framtida:



Prosjektidear:

Inspirert av desse 5 kriteria, kom vi fram til 5 prosjekt som kan gjere lokalsamfunnet til ein endå betre stad for folk i alle aldrar og med ulik bakgrunn:

Mjeldavågen rundt

Dette prosjektet skal få til ein lavterskel turveg rundt Mjeldavågen, som er tilgjengeleg for ALLE, om ein går eller bruker rullestol. Det er nokre hindringar, som at enkelte parti er utsett for rasfare. Alle grunneigarane må vera klare for å samarbeida. Andre utfordringar er tekniske. Det trengst til dømes kanskje ein sti som er bolta fast til fjellet. Gruppa var klar over at det trengst ein del pengar, men at det er gode moglegheiter for å få til eit samarbeid med mellom andre speidarane og skulen.

Bruvik idrettsplass og
Neset

Dette prosjektet har fleire definerte trinn og skal få til mange fine tiltak på Bruvik, mellom anna sosiale møteplassar, ei multibane, leikeapparat, minigolf og forskjønning av området. På Neset vil dei rydda området og setja opp bord og benkar, og kanskje gapahuk og badeplass. [Fortset på neste side]

Mykje blir gjort på dugnad (på tvers av generasjonar!), men det trengst pengar! Dei har allereie fått inn ein del pengar (inkludert frå MED-fondet). Det er viktig med samarbeid slik at både Neset og idrettsplassen blir utbetra. Gruppa vil gå i dialog med kommunen om å få lov til å rydda i skogen ved Neset.

Aktivitetspark i Haus

Dette prosjektet skal få til ein aktivitetspark som er fin for alle barn og unge i Haus og omkring. Ungdommane vil gjerne ha ei nedgravd trampoline (eller to). Basketball og skatepark er òg på ønskelista. Ungdommane har allereie nokre idear om kvar desse tinga kan plasserast rundt skulen. Dei skal snakka meir om dette i elevrådet og utvikla ein plan som kan brukast til å skaffa finansiering.

Sanatoriet i Haus

Dette prosjektet er allereie i gong og ein er komme langt mot målet om å pussa opp Sanatoriet i Haus og gjera det tilgjengeleg for alle. Det er allereie vorte ein fantastisk møteplass, men mykje arbeid gjenstår. Dei skal laga gongsti, badeplass og utvikla området mot Straumen og Prestebrua. Utfordringa er tilgjenge til andre sida av Prestebrua. Mange ungdommar er allereie involvert i dugnadsarbeid og dei fortset å ta eigarskap til prosjektet. Kultur og historie gjennomsyrrer heile prosjektet!

Kulturhus.... Eller opna opp kyrkja

Dette prosjektet hadde i utgangspunkt som mål å få til eit kulturhus på Osterøy. Det hadde gruppa lyst til, men til slutt snakka dei meir om å kunna opna opp kyrkja for fleire brukarar. Haus har allereie eit fantastisk kulturhus –kyrkja- men det er få som bruker det. Viss vi kunne fått fleire til å bruka kyrkja, og fått pussa opp området rundt Straumen, hadde det vore smykket i bygda... Saman med Sanatoriet og stien rundt heile Mjeldalsvatnet. Alt heng saman!

Vidare:

Først og fremst håper me at de gjennom desse diskusjonane vart inspirert til å fortsetja arbeidet med desse prosjekta sjølv. Verdiane og prosjektideane som kom frå verkstaden kjem til å påverka utforminga av den nye kommunedelplanen for idrett og fysisk aktivitet. De er velkomne til å søkja finansiering (opptil 10 000 kr) frå MED-fondet (dette blir delt ut fortløpande fram til det er tomt). MED-fondet støttar lokale prosjekt der fokuset er på barn og ungdom, eller på læring og samarbeid på tvers av generasjonar (<https://bit.ly/medfond>)

Tusen takk for ein fantastisk verkstad!

Kontakt:

Kommunedelplan for idrett og fysisk aktivitet: Linda Svidal Nordås (linda.svidal.nordas@osteroy.kommune.no) , Wenche-Mari Bliksås (wenche-mari.bliksas@osteroy.kommune.no)

MED-Osterøy Ivar Sandgren (frem til 1. april) (Ivar.Sandgren@osteroy.kommune.no), og Mathew Stiller-Reeve (mathew@stillerreeve.no)